


FAVORITONAN DI DEN AMBIENTE PA E GRAN ANOCHI FINAL DI CALYPSO & ROADMARCH CONTEST..

Fotos/Texto: Jan Poets

DEN AMBIENTE




**** LORD CACHETE.. "BACK" ..**

** Pa e gran final di Calypso & Roadmarch Contest awenochi den Joe Laveist Sportpark, DEN AMBIENTE ta pronostica su favoritonan pa bay cu e titulon. Apesar cu DEN AMBIENTE no a scucha e calypso y roadmarch di MIGHTY TALENT, toch e ta keda como un di e gran favorito pa bay cu ambos titulo, pasobra semper Mighty Talent ta bin cu su sorpresanan cu ta laga e publico keda ta tembla. LONG ROY cu su "Bull Jam" ta un di e fuertenan pa bay cu e titulo como Roadmarch King. Su roadmarch tin tur e kick pa forma un tremendo ambiente durante e paradanan. MIGHTY HIPPIE

despues di dos aña a bin hopi fuerte cu su Calypso "Big Mistake" y tin tur e ingredientenan pa bay cu e titulo. Algo ta sigur, maske cu e no logra, e Calypso aki ta bay bira un hit igualmente cu e su tremendo "Tingiling song".

LORD CACHETE no a bin for di Hulanda por nada y a demostra esey un biaha mas cu e ta e showman number 1 den Calypso & Roadmarch Contest. Su falta a ser sinti enormemente durante e ultimo dos añanan cu e no tabata presente. Lord Cachete lo por ta e sorpresa di awenochi cu su Calypso "Back" y tambe su roadmarch "Dushi Aruba" ta hopi peligroso.



**** LONG ROY.. "BULL JAM".**



**** MIGHTY HIPPIE.. "BIG MISTAKE"**

MIGHTY TALENT MESTER BIN HOPI DURO AWENOCHI PA RETENE SU DOS TITU- LONAN..

** Awenochi manera tur biaha den e ultimo festivalnan di Calypso & Roadmarch Contest, tur hende ta pendiente ta cu ki tema Mighty Talent ta bin cu ne, pasobra tur biaha muy en particular su Calypso ta uno picante y interesante cu for di momento cu e cuminsa interpreta su prome couplet, ya practicamante e ta un ganador pa e publico.

Awenochi esaki lo bay ta e mesun caso sin duda algun. Ya cu e publico a scucha, mira y goza di e demas finalistanan, e momento mas interesante awenochi durante e final sin duda lo ta e aparicion



di Claudius Philips riba escenario. Mighty Talent tin e record di 13 biaha Calypso King y 9 biaha Roadmarch King. Awenochi e lo presenta cu su Calypso

"Basta" y su Roadmarch "Solo Jam". E Calypso ta mustra hopi interesante "TA...BAS-TAAAAAAA"...

BMW SU CD "CHUPE" A YEGA ARUBA..

** Ayeranochi DEN AMBIENTE a ricibi e CD di BMW cu a caba di yega Aruba ayera anochi mes. Manera DEN AMBIENTE a relata recientemente cu e titulo di e CD ta "Chupe", y e produccion ta conta cu seis cancion ritmo carnavalesco.

Por bisa cu e hit promocional "Drama" ya a cosecha su exito riba nos radio emisoranan, mientras cu riba e CD mes aki tin temanan cu sigur lo bay haya nan debido exito. Riba e CD ta aparece temanan manera "Chupe-Yrie in carnival-Soca sweet-Run things y Massiveness".

E aña aki un biaha mas BMW ta mihor prepara cu nunca pa e temporada di Carnaval 44. Esaki a keda demostra tambe durante e pre final di Calypso & Roadmarch Contest, den cual tres di nan integrantenan a logra di bay pa e anochi final, kendenan ta Mighty Smooth (Dito Rogers), Daddy Bass (Randolph Berry) y Afro (James Sneek). Durante e festival nan a ser acompaña pa nan propio banda musical. Por a compronde cu durante e paradanan y presentacionnan, BMW lo sigui ser respalda pa e banda completo consisti di un guitarrista, bajista, pianista y drummer. Tambe conhuntamente cu nan cuater estrema cantantenan, BMW lo ser reforsa cu dos mucha muher pa asina forma un espectáculo mas potente cu nunca.

DEN AMBIENTE a ser informa cu ya e CD aki ta obtenible na tur nos disco barnan y tambe awenochi por cumpre cerca e propio integrante cu firma riba dje, durante e final di e festival di Calypso & Roadmarch den Joe Laveist Sportpark. Pa esnan cu ta interesa pa un CD "Chupe" y tambe un presentacion di BMW cu nan banda completo, por tuma contacto cu Alah na tel:827598 of Base na tel:846161..

